

El Nino: Cegah aktiviti pembakaran terbuka

KUALA LUMPUR 13 Jan. - Jabatan Meteorologi menjangkakan cuaca panas dan kering yang ketika ini berlaku di Kedah dan Perlis akan melanda seluruh negara pada penghujung Januari sehingga Mac ini.

Menteri Sumber Asli dan Alam Sekitar, Datuk Seri Dr. Wan Junaidi Tuanku Jaafar berkata, keadaan itu disebabkan fenomena El Nino kuat yang sedang berlaku dan dijangka menyebabkan jerebu.

"Kementerian dan setiap agensi yang terlibat dalam pengurusan jerebu sedang mempertingkatkan usaha-usaha pencegahan ke atas aktiviti pembakaran terbuka yang berpotensi menyebabkan jerebu di peringkat tempatan.

"Kita telah mengaktifkan Pelan Tindakan Pencegahan Pembakaran Terbuka di seluruh negara mulai semalam yang merangkumi aktiviti rondaan darat, penguatkuasaan, tindakan mahkamah dan kempen kesedaran," katanya dalam satu kenyataan di sini hari ini.


Tambah Wan Junaidi, kawasan tanah gambut yang sering terbakar juga akan dipantau dengan rapi melalui Prosedur Tetap Operasi (PTO) Program Pencegahan dan Pengurusan Tanah Gambut Sering Terbakar.

Selain itu, agensi terlibat juga akan membuat pemantauan melalui udara bagi mencegah kebakaran hutan terutama di kawasan sering terbakar termasuk kawasan pedalaman yang berisiko tinggi untuk terbakar.

"Saya akan mempengerusikan Mesyuarat Induk Jerebu Kebangsaan pada 11 Februari ini bagi membincangkan tindakan pencegahan jerebu dan tindak balas kecemasan antara agensi untuk menangani situasi jerebu yang tidak menentu semasa cuaca panas dan kering.

"Jabatan Alam Sekitar (JAS) melaporkan, setakat ini sebanyak 33 kes pembakaran terbuka dikesan di seluruh negara. Bagi tindakan penguatkuasaan untuk tempoh sama, sebanyak empat kes telah dikenakan kompaun, satu kes diberikan Notis Arahan dan satu lagi diberikan Surat Arahan," katanya.

Mengulas lanjut, Wan Junaidi menasihatkan semua pihak tidak melakukan pembakaran terbuka atau membiarkan tanah atau premis milik sendiri dimasuki atau diceroboh sehingga menyebabkan pembakaran terbuka sama ada sengaja atau tidak sengaja.



WAN JUNAIDI